



Dette plommetreet med ballongar med hjartevarme helsingar står no trygt planta på Neset.

Plommetreet de ser på biletet over, er ikkje noko vanleg plommetre. Plommene er ballongar. Ballongane er ikkje berre fylt med luft. Dei inneheld nemleg hjartevarme helsingar. Det er ei flott og rørende gåve til kontaktlærer Åse Neset frå avgangsklassen på Uskedal skule og vart overrekt på festen tirsdag kveld.

På avslutningsfesten for 7.klasse var det eit fint program. Først var det eit innslag av ei dansegruppe. Deretter vart det komikk der parodiering var sentralt. Torbjørn Haugland, Kristian Øvstebø og Anders Isdal-Myklebust stod for det. Torbjørn parodierte bloggaren Sophie Elise medan Kristian tok seg av rolla som Knut Arild Hareide. Anders var journalist som intervjuar desse. Knallbra var det! Det var det også i det neste innslaget då Torbjørn framførte ein glitrande parodi på Kongen sin nyttårstale. Etter at latteren hadde lagt seg, framførte alle dei 23 elevane ein fellesdans som ein flott avslutning på denne programdelen.



[Åse overrekte ein hoppmist til kvar elev.](#)

Det var også talar og gåveoverrekking. Vi har fortalt om den flotte gåva frå elevane til den omtytte Åse. Åse hadde gode ord om og til elevane. Ho gav også gåve til kvar elev; - ein hoppmist som skulle symbolisera at no er det ein ny start. Hilde Bringedal og Brit Hjetland hadde klassen frå 1. til 4.klasse. Dei tala og mimra til elevane.

6.klasseforeldra hadde absolutt gjort sitt til at festen vart så vellukka. Dei sytte for maten som var flott og delikat tillaga, og var med gjorde sitt til at elevane følte seg verdsett. Det vart servert taco, og til dessert fekk dei is og frukt-coctail.

Åse Neset seier at det var ein hyggeleg kveld sjølv om det også er vemodig. Ho trur at elevane no er klare for å begynna på ungdomsskulen, og ser fram til det. Ho syns ungdomsskulen har gjort ein god jobb for å gjera overgangen så grei som mogeleg for elevane. Dei har blitt tatt godt i mot, og det har vore besøk begge vegar. Foreldra har også vore på ungdomsskulen og har fått informasjon.

- Ungdomsskulen har handtert dette veldig godt, syns eg. Dei starta i god tid, og eg føler tryggheten har begynt å siga inn. Eg trur dei er klare for ungdomsskulen, seier Åse Neset.

Eg er sikker på at ho kjem til å ta mange turar ut til plommetreet i tida framover, stoppa opp, lesa på ballongane og tenkja på dei 2 åra ho har hatt saman med dei 23 elevane. Frå foreldrehald er eg beden om å ta med at Åse har gjort ein fantastisk jobb med klassen.

Tekst og nett: Thor Inge Døssland

Foto: Kjersti N. Børve og Thor Inge Døssland